

四庫全書

子部

欽定四庫全書

冊府元龜卷五百三十八 宋王欽若等撰

諫諍部

直諫第五

後漢爰延桓帝時為大鴻臚太史上言客星經帝座密以問延延因上封事曰臣聞天子尊為無上故天以為子位臨臣庶威重四海動靜以禮則星辰順序意有邪僻則晷度錯違陛下以河南尹鄧萬有龍潛之舊封為

通侯恩重公卿惠豐宗室加傾引見與之對博上下媒
黷有虧尊嚴臣聞之帝左右者所以咨德政也故周公
戒成王曰其朋其朋言慎所與也昔宋閔公與強臣共
博列婦人於側積此無禮以致大菑武帝與倖臣李延
年韓嫣同卧起尊爵重賜情欲無厭遂生驕淫之心行
不義之事卒使延年被戮嫣伏其辜夫愛之則不覺其
過惡之則不知其善所以事多放濫物情生怨故王者
賞人必酬其功爵人以甄其德善人同處則日聞嘉訓

惡人從游則日生邪情孔子曰益者三友損者三友邪
臣惑君亂妾危主以非所言則悅於耳以非所行則翫
於目故令人君不能遠之仲尼曰唯女子與小人為難
養近之則不遜遠之則怨蓋聖人明戒也昔漢光武皇
帝與嚴光俱寢上天之異其夕即見夫以光武之聖德
嚴光之高賢君臣合道尚降此變豈況陛下今所親倖
以賤為貴以卑為尊哉惟陛下遠讒諛之人納謇謇之
士除左右之權寤宦官之敝使積善日熙佞惡消殄則

乾菑可除帝省其奏因以病自上乞骸骨還家

趙典桓帝時為大鴻臚典以恩澤諸侯無勞受封羣臣
不悅而莫敢諫獨奏曰夫無功而賞勞者不勸上忝下
辱亂象干度且高祖之誓非功臣不封宜一切削免爵
土以存舊典帝不從

劉瑜桓帝時舉賢良方正到京師上書曰臣瑜自念東
國鄙陋得以豐沛枝裔被蒙復除不給卒伍故太尉楊
秉知臣竊闕典籍猥見顯舉誠冀臣愚直有補萬一而

秉忠謨不遂命先朝露臣在下土聽聞歌謠驕臣虐政
之事遠近呼嗟之音竊為辛楚泣血漣如幸得引錄備
答聖問泄寫至情不敢庸回誠願陛下且以須臾之慮
覽今往之事人何為咨嗟天曷為動變蓋諸侯之位上
法四七垂文炳耀闕之盛衰者也今中官邪孽比肩裂
土皆競立裔嗣繼體傳爵或乞子踈屬或買兒市道殆
乖開國承家之義古者天子一娶九女娣姪有序河圖
受嗣正在九房今女嬖令色克積閨幃皆當盛其玩飾

冗食空宮勞散精神生長六疾此國之費也生之傷也
且天地之性陰陽正紀隔絕其道則水旱為并詩云五
日為期六日不詹怨曠作歌仲尼所錄况從幼至長幽
藏歿身又常侍黃門亦廣娶妻妾怨毒之氣結成妖青
行路之言官發略人女取而復置轉相驚懼孰不悉然
無緣空生此謗鄒衍匹夫杞氏匹婦尚有城摧霜隕之
異况乃羣輩咨怨能無感乎秦作阿房國多刑人今第
舍增多窮極奇巧掘木攻石不避時令促以嚴刑威以

法政民無罪而復入之民有田而復奪之州郡官府各
自考事姦情賕賂皆為吏餌民愁鬱結起入賊黨官趣
興兵誅討其罪貧困之民或有賣其首級以要酬賞父
兄相代殘身妻奴相視分裂窮之如彼代之如此豈不
痛哉又陛下以北辰之尊神器之寶而微行近習之家
私幸宦者之舍賓客市買燠灼道路因此暴縱無所不
容今三公在位皆博達道藝而各正諸已莫或裨益者
非不智也畏死罰也惟陛下設置七臣以廣諫道及開

東序金滕史官之書從堯舜禹湯文武致興之道遠佞
邪之人放鄭衛之聲則致和平德感祥風矣臣慙慙推
情言不足採懼以觸忤忤營惛惛於是特詔召瑜問菑
咎之徵指事按經識以對執政者欲令瑜依違其辭而
更策以他事瑜復悉心以對八千餘言有加於前帝竟
不能用拜為議郎瑜與竇武同誅其後宦者悉焚其上
書以為訛言

審忠梁人為郎中靈帝初中常侍曹節與長樂五官史

朱瑀等矯詔誅大將軍竇武太傅陳蕃遷竇太后於南宮連有留異忠以爲朱瑀等罪惡所感乃上書曰臣聞理國得賢則安失賢則危故舜有臣五人而天下治湯舉伊尹不仁者遠陛下即位之初未能萬幾皇太后念在撫育權時攝政故中常侍蘇康管霸應時誅殄太傅陳蕃大將軍竇武考其黨與志清朝政華容侯朱瑀知事覺露禍及其身遂興造逆謀作亂王室撞躅省闥執奪墜綬迫脇陛下聚會羣臣離間骨肉母子之恩遂誅

蕃武及尹勲等因共割裂城社自相封賞父子兄弟被蒙尊榮素所親厚布在州郡或登九列或據三司不惟祿重位尊之責而苟營私門多蓄財貨繕修第舍連里竟巷盜取御水以作魚釣車馬服玩擬於天家羣公卿士杜口吞聲莫敢有言州牧郡守承順風旨辟召選舉釋賢取愚故蟲蝗為之生夷寇為之起天意憤盈積十餘年故頻歲日食於上地震於下所以譴戒人主欲令覺悟誅鉏無狀昔高宗以雉雊之變故獲中興之功近

者神祇啓悟陛下發赫斯之怒故王甫父子應時馘截
行路人士莫不稱善若除父母之讐誠怪陛下復忍孽
臣之類不悉殄滅昔秦信趙高以危其國吳使刑人身
遺其禍虞公抱寶牽馬魯昭見逐乾侯以不用宮之奇
子家駒以至滅辱今以不忍之恩赦夷族之罪姦謀一
成悔亦何及臣為郎十五年皆耳目聞見瑀之所為誠
皇天所不復赦願陛下留漏刻之聽裁省臣表掃滅醜
類以答天怒與瑀考驗有不如言願受湯鑊之誅妻子

并徙以絕妄言之路章寢不報宦官誅後辟公府

張奐靈帝時為大司農熹平元年青蛇見於御座軒前
又大風雨雹霹靂拔樹詔使百僚各言蓄應奐上疏曰
臣聞風為號令動物通氣木生於火相須乃明蛇能屈
伸配龍騰蟄順至為休徵逆來為殃咎陰氣專用則凝
積為雹故大將軍竇武太傅陳蕃或志寧社稷或方正
不回前以讒勝並伏誅戮海內默默人懷震憤昔周公
葬不如禮天乃動威今武蕃忠貞未被明宥妖青之來

皆為此也宜急爲改葬徙還家屬其從坐禁錮一切蠲除又皇太后雖居南宮而恩禮不按朝臣莫言遠近失望宜思大義顧復之報天子深納奐言以問諸黃門常侍左右皆惡之帝不得自從

謝弼爲郎中熹平初青蛇之異弼上封事曰臣聞和氣應於有德妖異生於失政上天告譴則王者思其愆政道或虧則姦臣當其罰夫蛇者陰氣所生鱗者甲兵之符也洪範傳曰厥極弱時則有蛇龍之孽又熒惑守亢

徘徊不去有近臣謀亂發於左右不知陛下所與從容
帷幄之內親信者為誰宜急斥黜以消天戒臣又聞惟
虺惟蛇女子之祥伏惟皇太后定策宮闈援立聖明書
云父子兄弟罪不相及竇氏之誅豈宜咎延太后幽隔
空宮愁感天心如有霧露之疾陛下當何面目以見天
下昔周襄王不能敬事其母戎狄遂至交侵孝和皇帝
不絕竇后之恩前世以為美談禮為人後者為之子今
以桓帝為父豈得不以太后為母哉援神契曰天子行

孝四夷和平方今邊境日感兵革蜂起自非孝道何以
濟之願陛下仰慕有虞蒸蒸之化俯思凱風慰母之念
臣又聞爵賞之設必酬庸勲開國承家小人勿用今功
臣久外未蒙爵秩阿母寵私乃享大封大風雨雹亦繇
於茲又故太傅陳蕃輔相陛下勤身王室夙夜匪懈而
見陷羣邪一旦誅滅甚為酷濫駭動天下而門生故吏
竝罹徙錮蕃身已往人百何贖宜還其家屬解除禁錮
夫台宰重器國命所係今之四公唯司空劉寵斷斷守

善餘皆素餐致寇之人必有折足覆餗之凶可因蓄異
竝加罷黜徵故司空王暢長樂少府李膺竝居政事庶
蓄變可消國祚惟永臣山藪頑闇未達國典策曰無有
所隱敢不盡愚用忘諱忌伏惟陛下裁其誅罰左右惡
其言出為廣陵府丞

楊賜為光祿勳熹平初青蛇之異靈帝以問楊賜上封
事曰臣聞和氣致祥乖氣致異休徵則五福應咎徵則
六極至夫善不空來蓄不空發王者心有所維意有所

想雖未形顏色而五星以之推移陰陽為其變度以此而觀天之與人豈不符哉尚書曰天齊乎人假我一日是其明徵也夫皇極不建則有蛇龍之孽詩云維虺維蛇女子之祥故春秋兩蛇鬪於鄭門昭公殆以女敗康王一朝晏起闕睢見譏而作夫女謁行則讒夫昌讒夫昌則苞苴通故殷湯以之自戒終濟亢旱之菑惟陛下思乾剛之道別內外之宜崇帝乙之制受元吉之祉抑皇甫之權割豔妻之愛則蛇變可消禎祥立應殷武宗

景其事甚明後為光祿大夫光和元年有虹蜺晝降於
嘉德殿前靈帝惡之引賜及議郎蔡邕等入金商門崇
德署使中常侍曹節王甫問以祥異禍福所在賜仰天
而嘆謂節等曰吾每讀張禹傳未嘗不憤恚嘆息既不
能竭忠盡情極言其要而反留意少子乞還女壻朱雲
欲得上方斬馬劍以理之固其宜也吾以微薄之學充
先師之末累世見寵無以報國猥當大問死而後已乃
書對曰臣聞之經傳或得神以昌或得神以亡國家休

明則鑒其德邪僻昏亂則視其禍今殿前之氣應為虹
蜺皆妖邪所生不正之象詩人所謂蝓蝓者也於中孚
傳曰蜺之比無德以色親方今內多嬖倖外任小人上
下竝怨誼譁盈路是以蓄異屢見前後丁寧今復投蜺
可謂熟矣案春秋識曰天投蜺天下怨海內亂加四百
之期亦復垂及昔虹貫牛山管仲諫桓公無近妃宮易
曰天垂象見吉凶聖人則之今妄媵嬖人閹尹之徒共
專國政欺罔日月又鴻都門下招會羣小造作賦說以

蟲篆小技見寵於時如驩兜共工更相薦說旬月之間
以各拔擢樂松處常伯任芝居納言邵儉梁鵠俱以便
辟之性佞諛之心各受豐爵不次之寵而令縉紳之徒
委伏猷畝口誦堯舜之言身蹈絕俗之行棄捐溝壑不
見逮及冠履倒易陵谷代處從小人之邪意順無知之
私欲不念板蕩之作虺蜴之戒殆哉之危莫過於今幸
賴皇天垂象譴告周書曰天子見怪則脩德諸侯見怪
則脩政卿大夫見怪則修職士庶人見怪則脩身惟陛

下慎經典之誠圖變復之道斥遠佞巧之臣速徵鶴鳴之士內親張仲外任山甫斷絕尺一抑止盤游留思庶政無敢怠遑冀上天還威衆變可弭老臣過受師傅之任數蒙寵異之恩豈敢愛惜垂沒之年而不盡其悽悽之心哉書奏甚忤曹節等以師傅之恩故得免咎

蔡邕為議郎光和初妖異數見人相驚擾靈帝詔問邕曰此蕃變立生未知厥咎朝廷焦心載懷恐懼每訪羣公卿士庶聞忠言而各存括囊莫肯盡心以邕經學深

與故密特稽問宜披露失得指陳政要勿有依違自生
疑諱且對經術以皂囊封上邕對曰臣伏惟陛下聖德
允明深悼蕃咎褒臣末學特垂訪及非臣螻蟻所能堪
副斯誠輸寫肝膽出命之秋豈可以顧患避害使陛下
不聞至戒哉臣伏思諸異皆亡國之怪也天於大漢殷
勤不已故屢出妖變以當譴責欲令人君感悟改危即
安今蕃青之發不於他所遠則門垣近則寺署其為監
戒可謂至切蜺墮鷄化皆婦人干政之所致也前者乳

母趙嬈貴重天下生則貲藏侔於天府死則丘墓踰於陵園兩子受封兄弟典郡續以永樂門史霍玉依阻城社又為姦邪今者道路紛紛復云有程夫人者察其風聲將為國患宜高為隄防明設禁令深推趙霍以為至戒今聖意勤勤思明雅正而聞太尉張顥為玉所進光祿勲偉章有名貪濁又長水校尉趙玪屯騎校尉蓋升竝叨時幸榮富優足宜念小人在位之咎退思引身避賢之福伏見廷尉郭禧純厚老成光祿大夫橋玄聰達

方直故太尉劉寵忠實守正竝宜為謀主數見訪問夫
宰相大臣君之四體委任責成優劣已分不宜聽納小
人雕琢大臣也又尚方工技之作鴻都篇賦之文可且
消息以示惟憂詩云畏天之怒不敢戲豫天戒誠不可
戲也宰府孝廉士之高選近者以辟召不慎切責三公
而今竝以小文超取選舉開請託之門違明王之典眾
之不厭莫之敢言臣願陛下忍而絕之思惟萬幾以答
天望聖朝既自約厲左右近臣亦宜從化人自抑損以

塞咎戒則天道虧滿鬼神福謙矣臣以愚慙感激忘身
敢觸忌諱手書具對夫君臣不密上有漏言之戒下有
失身之禍願寢臣表無使盡忠之吏受怨姦仇章奏帝
覽而嘆息竟為中官所搆坐徙朔方

和海為上祿長靈帝時詔州郡考黨人門生故吏父子

兄弟其在位者免官禁錮爰及五屬

謂五服也

海上言禮從

祖兄弟別居異財恩義已輕服屬疎末而今黨人錮及

五族既乖典訓之文有謬經常之法

左傳曰父子兄弟罪不相及也帝

覽而悟之黨錮自祖以下皆得解釋

陸康為樂安太守時靈帝欲鑄銅人而國用不足乃詔
調民田畝斂十錢而比水旱傷稼百姓貧苦康上疏諫
曰臣聞先王治世貴在愛民省徭輕賦以寧天下除煩
就約以崇簡易故萬姓從化靈物應德末世衰主窮奢
極侈造作無端典制非一勞割自下以從苟欲故黎民
吁嗟陰陽感動陛下聖德承天當隆盛化而卒被詔書
畝斂田錢鑄作銅人伏讀惆悵悼心失圖夫十一而稅

周謂之徹徹者通也言其法度可通萬世而行也故魯
宣稅畝而蠲菑自生襄公增賦而孔子非之豈有聚奪
民物以營無用之銅人捐舍聖戒自蹈亡王之法哉傳
曰君舉必書書而不法後世何述焉陛下宜留神省察
改敝從善以塞兆民怨恨之望書奏內倖因此譖康援
引亡國以譬聖明大不敬檻車徵詣廷尉侍御史劉岱
典考其事岱為表陳解釋免歸田里復徵拜議郎

劉陶為侍御史靈帝時鉅鹿張角偽託大道妖惑小民

陶與奉車都尉樂松議郎袁貢連名上疏言之曰聖王
以天下耳目為視聽故能無不聞見今張角友黨不可
勝計前司徒楊賜奏下詔書切勅州郡護送流民會賜
去位不復捕錄雖會赦令而謀不解散四方私言云角
等竊入京師覘視朝政烏聲獸心私共嗚呼州郡忌諱
不欲聞之但更相告語莫肯公文宜下明詔重募角等
賞以國土有敢回避與之同罪帝殊不悟徙京兆尹稱
疾徵諫議大夫是時天下日危寇賊方熾陶憂致亂復

上疏曰臣聞事之急者不能安言心之痛者不能緩聲
竊見天下前遇張角之亂後遭邊境之寇每聞羽書告
急之聲心灼內熱四體驚悚今西羌逆類私署將帥皆
多段熲時吏曉習戰陳識知山川變詐萬端臣嘗懼其
輕出河東馮翊鈔西軍之後東之函谷據阨高望今果
已攻河東遂更豕突上京如是則南道斷絕車騎之軍
孤立關東破膽四方搖動威之不來叫之不應雖有田
單陳平之策計無所用臣前驛馬上便宜急絕諸郡賦

調冀尚可安事付主者留連至今莫肯求問今三郡之民皆以奔亡南出武關北徙壺谷水駭風散唯恐在後今其存者尚十三四軍吏士民悲愁相守民有百走退死之心而無一前鬪生之計西寇侵前去營咫尺北騎分布已至諸陵將軍張溫天性精勇而主者旦夕迫促軍無後殿假令失利其敗不救臣自知言數見厭而意不自裁者以為國安則臣蒙其慶國危則臣亦先亡也謹復陳當今惡急八事乞須臾之間深垂納省其八事

大較言天下大亂皆繇宦官官事急共讒陶下獄死
張鈞中山人為郎中靈帝時內官張讓趙忠及夏惲郭
勝孫璋畢風栗嵩段珪高望張恭韓悝宋典十二人皆
為中常侍封侯貴寵父子兄弟布列州郡所在貪殘為
人蠹害黃巾既作盜賊麋沸鈞上書曰竊惟張角所以
能興兵作亂萬人所以樂附之者其源皆繇十常侍多
放父兄子弟婚親賓客典據州郡掌權財利侵掠百姓
百姓之冤無所告訴故謀議不軌聚為盜賊宜斬十常

侍懸頭南郊以謝百姓又遣使者布告天下可不須師
旅而大寇自消天子以鈞章示讓等皆免冠徒跣頓首
乞自致雒陽詔獄竝出家財以助軍費有詔皆冠履視
事如故帝怒鈞曰此真任子也十常侍固當有一人善者
不鈞復重上猶如前章輒寢不報詔使廷尉侍御史考
為張角道者御史承讓等旨遂誣奏鈞學黃巾道收掠
死獄中而讓等實多與張角交通

魏霍性為度支中郎將延康元年六月文帝為魏王將

出南征性上疏諫曰臣聞文王與紂之事是時天下括囊無咎凡百君子莫肯用訊今大王體則乾坤廣開四聰使賢愚各建所規伏惟先王功無與比而今能言之類不稱為得故聖人曰得百姓之歡心兵書曰戰危事也是以六國力戰強秦承弊幽土不爭周道用興愚謂大王且當委重本朝而守其雌抗威虎臥功業可成而今紉基便復起兵兵凶器必有凶擾擾則思亂亂出人意臣謂此危危於累卵昔夏啓隱神三年易有不遠而

復論有不憚改誠願大王揆古察今深謀遠慮與士大夫算其長短臣沐浴先王之遇又初改政復受重任雖知言觸龍鱗阿諛近福竊感所謂危而不持奏通帝怒刺姦就考竟殺之既而悔之追原不及

毛玠為尚書僕射時太子未定立臨淄王植有寵玠諫曰近袁紹以嫡庶不分覆宗滅國廢立大事非所宜聞會玠起更衣太祖謂左右曰國之司直我之周昌

鮑勛為侍中文帝受禪勛每陳今之所急唯在軍農寬

惠百姓臺榭苑囿宜以為後文帝將出游獵勛停車上
疏曰臣聞五帝三王靡不明本立教以孝治天下陛下
仁聖惻隱有同古烈臣竊當繼蹤前代令萬世可則也
如何在諒陰之中脩馳驅之事乎臣冒死以聞唯陛下
察焉帝手毀其表而競行獵中道頓息問侍臣曰獵之
為樂何如八音也侍中劉暉對曰獵勝於樂勛抗辭曰
夫樂上通神明下和人理隆治教化萬邦咸乂故移風
易俗莫善於樂况獵暴華蓋於原野傷生育之至理櫛

風沐雨不以時隙哉昔魯隱觀魚于棠春秋譏之雖陛下以為務愚臣所不願也因奏劉璘佞諛不忠阿順陛下過戲之言昔梁丘據取媚於遄臺璘之謂也請有司議罪以清皇朝帝怒作色罷還出勛為右中郎將黃初六年秋帝欲征吳羣臣大議勛為宮正面諫曰王師屢征而未有所克者蓋以吳蜀脣齒相依憑阻山水有難拔之勢故也往年龍舟飄蕩隔在南岸聖躬蹈危臣下破膽此時宗廟幾至傾覆為百世之戒今又勞兵襲遠

日費千金中國虛耗令黠虜玩威臣竊以為不可帝益忿之左遷勛為治書執法

棧潛為侍中黃初三年文帝欲立郭后潛上疏曰在昔帝王之治天下不惟外輔亦有內助治亂所繇盛衰從之故西陵配黃英娥降嫺竝以賢良流芳上世桀奔南巢禍階妹喜紂以炮烙怡悅妲已是以聖哲慎立元妃必取先代世族之家擇其令淑以統六宮虔奉宗廟陰教聿脩易曰家道正而天下定繇內及外先王之令典

也春秋書宗人釁夏云無以妾為夫人之禮齊桓誓命於葵丘亦曰無以妾為妻今後宮嬖寵常亞乘輿若因愛登后使賤人暴貴臣恐後世下陵上替開張非度亂自上起也文帝不從遂立為皇后明帝時衆役竝興戚屬疏斥潛諫曰天生蒸民而樹之君長所以覆燾羣生熙育兆庶故方制四海匪為天子裂土分疆匪為諸侯也始自三皇爰暨唐虞咸以博濟加于天下醇德以洽黎元賴之三王既微降逮于漢理日益少喪亂弘多自

時厥後亦罔克又太祖濬哲神武芟除暴亂克復王綱
以開帝業文帝受天明命廓恢皇基踐阼七載每事未
遑陛下聖德纂承洪緒宜崇晏晏與民休息而方隅匪
寧征夫遠戍有事海外縣旌萬里六軍騷動水陸轉運
百姓含業日費千金大興殿舍功作萬計徂徠之松刊
山窮谷怪石琺瑯浮於河淮都圻之內盡為甸服當供
橐駝銍粟之調而為苑囿擇禽之府盛林莽之穢豐鹿
兔之藪傷害農功地繁茨棘蕃疫流行民物大潰上減

和氣嘉禾不植臣聞文王作臺經始勿亟百姓子來不日而成靈沼靈囿與民共之今宮觀崇侈雕鏤極妙忘有虞之摠期思殷辛之瓊室禁地千里舉足投網麗阿房役百乾谿臣恐民力雕盡下不堪命也昔秦據殽函以制六合自以為德高三皇功兼五帝欲號謚至萬葉而二世顛覆願為黔首繇枝幹既朽本實先拔也蓋聖王之御世也克明峻德庸勲親親俊乂在官則功業可隆親親顯用則安危同憂深根固本竝為幹翼雖厯盛

衰内外有輔昔成王幼冲未能蒞政周呂召畢竝在左
右今既無衛侯康叔之監分陝所任又非旦奭東宮未
建天下無副願陛下留心關塞永保無極則海内幸甚
董昭為侍中文帝幸苑征南大將軍夏侯尚等攻江
陵未拔時江水淺狹尚欲乘船將步騎入渚中安屯作
浮橋南北往來議者多以為城必可拔昭上疏曰武皇
帝智勇過人而用兵畏敵不敢輕之若此也夫兵好進
惡退常然之數平地無險猶尚艱難就當深入還道宜

利兵有進退不可如意今屯渚中至深也浮橋而濟至危也一道而行至狹也三者兵家所忌而今行之賊頻攻橋設有漏失渚中精銳非魏之有將轉化為吳矣臣私感之忘寢與食而議者怡然不以為憂豈不惑哉加江水尚長一旦暴增何以防禦就不破賊尚當自全奈何乘危不以為懼事將危矣惟陛下察之帝悟昭言即召尚等促出賊兩頭竝前官兵一道引去不時得泄將軍石建高遷僅得自免軍出旬日江水暴長帝曰論此

事何其審也正使張陳當之何以復加

蔣濟為護軍將軍太和中明帝遣平州刺史田豫乘海
渡幽州刺史王雄陸道共攻遼東濟諫曰凡非相吞之
國不侵叛之臣不宜輕伐伐之而不制是驅使為賊故
曰虎狼當路不治狐狸先除大害小害自己今海表之
地累世委質歲選計者不乏職貢議者先之正使一舉
便克得其財不足為富倘不如意是為結怨失信也帝
不聽豫行竟無成而還景初中外勤征役內務宮室怨

曠者多而年穀饑饉濟上䟽曰陛下方當恢崇前緒光濟遺業誠未得高枕而治也今雖有十二州至於民數不過漢時一大郡二賊未誅宿兵邊陲且耕且戰怨曠積年宗廟宮室百事草創農桑者少衣食者多今其所急唯當息耗百姓不至甚弊弊敝之民倘有水旱百萬之衆不為國用凡使民必須農隙不奪其時夫欲大興功之君先料其民力而燠休之句踐養胎以待用昭王恤病以雪仇故能以弱燕服彊齊羸越滅勁吳今二敵

不攻不滅不事即侵當身不除百世之責也以陛下聖明神武之略舍其緩者專心討賊臣以為無難矣又歡娛之耽害於精爽神太用則竭形太勞則弊願大簡賢妙足以充百斯男者其冗散未盡且悉分出務在清淨詔曰徵護軍吾弗聞斯言也

楊偉為侍中明帝治宮室偉諫曰今作宮室斬伐生民墓上松柏毀壞碑獸石柱幸及亡人傷孝子心不可以為後世之法則辛毗為衛尉明帝方脩殿舍百姓勞役毗上疏曰竊聞

諸葛亮講武理兵而孫權市馬遼東量其意指似欲相
左右備豫不虞古之善政而今者宮室大興加連年穀
麥不收詩云民亦勞止汔可小康惠此中國以綏四方
唯陛下為社稷計帝報曰二虜未滅而理宮室直諫者
立名之時也夫王者之都當及民勞兼辦使後世無所
復增是蕭何為漢規模之略也今卿為魏重臣亦宜解
其大歸帝又欲平北芒令其於上作臺觀則見孟津毗
諫曰天地之性高高下下今而反之既非其理加以損

費人功民不堪後且若九河盈溢洪水為害而邱陵皆夷將何以禦之帝乃止

高柔為廷尉明帝世大興殿舍百姓勞役廣采衆女充盈後宮後宮皇子連天繼嗣未育柔又上疏曰二虜狡猾潛自構肆謀動干戈未圖束手宜畜養將士繕治甲兵以逸待之而頃興造殿舍上下勞擾若使吳蜀知人虛實通謀并勢復歸送死甚不易也昔漢文惜十家之資不營小臺之娛去病慮匈奴之害不遑治第之事况

今所損者不惟百金之費所憂者非徒北狄之患乎可
粗成見所營立以充朝宴之儀訖罷作者使得就農二
方平定復可徐興昔軒轅以二十五子傳祚彌遠周室
以姬國四十歷年滋多陛下聰達窮理盡性而頃皇子
連多天逝熊羆之祥又未感應羣下之心莫不悵戚周
禮天子后妃以下百二十人嬪嬙之儀既已盛矣竊聞
後庭之數或復過之聖嗣不昌殆亦繇此臣愚以為可
妙簡淑媛以備內官之數其餘盡遣還家且以育精養

神專靜為寶如此則螽斯之徵可庶而致矣帝報曰知卿忠允乃心王室輒克昌言他復以聞

楊阜為將作大匠明帝時帝理宮室發美女以充後庭數出入弋獵秋大雨震電多殺鳥雀阜上疏曰臣聞明主在上羣下盡辭堯舜聖德求非索諫大禹勤功務卑宮室成湯遭旱歸咎責已周文刑於寡妻以御家邦漢文躬行節儉身衣弋綈此皆能昭令聞貽厥孫謀者也伏惟陛下奉武皇帝開拓之大業守文皇帝克終之元

緒誠宜思齊往古聖賢之善理摠觀李世放蕩之惡政
所謂善政者務儉約重民力也所謂惡政者從心恣欲
觸情而發也惟陛下稽古世代之初所以明赫及李世
所以衰弱至於泯滅近覽漢末之變足以動心誠懼矣
曩使桓靈不廢高祖之法法文景之恭儉太祖雖有神
武於何施其能邪而陛下何繇處斯尊哉今吳蜀未定
軍旅在外願陛下動則三思慮而後行重慎出入以往
鑒來言之若輕成敗甚重頃者天雨又多卒暴雷電非

常至殺鳥雀天地神明以王者為子也政有不當則見
菑譴克已內訟聖人所記惟陛下慮患無形之外慎萌
纖微之初法漢孝文出惠帝美人令得自嫁頃所調送
小女遠聞不令宜為後圖諸所繕理務從約節書曰九
族既睦協和萬邦事思厥宜以從中道精心計謀省息
費用吳蜀以定爾乃上安下樂九親熙熙如此以往祖
考心歡堯舜其猶病諸今宜開大信於天下以安衆庶
以示遠人時雍丘王植怨於不齒藩國至親法禁峻密

故阜又陳九族之義焉詔報曰間得密表先陳往古明
王聖主以諷聞政切至之辭款誠篤實退思補過將順
匡救備至矣覽思若言吾甚嘉之後遷少府時大司馬
曹真伐蜀遇雨不進阜上疏曰昔文王有赤烏之符而
猶日昃不暇食武王白魚入舟君臣變色而動得吉瑞
猶尚憂懼况有蓄異而不戰竦者今吳蜀未平而天屢
降變陛下宜深有以專精應答仄席而坐思示遠以德
綏邇以儉聞者諸軍始進便有天雨之惠稽關山險已

積日矣轉運之勞擔負之苦所費已多若有不繼必違
本圖傳曰見可而進知難而退軍之善政也徒使六軍
困於山谷之間進無所畧退又不得非主兵之道也武
王還師殷卒以亡知天期也今年凶民饑宜發明詔損
膳減服技巧珍玩之物皆可罷之昔邵信臣為少府於
無事之世而奏罷浮食今者軍用不足益宜節度帝即
召諸軍還帝愛女淑未期而天帝痛之甚追封平原公
主立廟雒陽葬於南陵將自臨送阜上疏曰文皇帝武

宣皇后山陵陛下皆不送葬所以重社稷備不虞也何
至孩抱之赤子而可送葬也哉帝不從帝既新作許宮
又營雒陽宮殿觀閣阜又上疏曰堯尚茅茨而萬國安
其居禹卑宮室而天下樂其業及至殷周或堂崇三尺
度以九筵耳古之聖帝明王未有極宮室之高麗以彫
弊百姓之財力者也桀作璇臺象廊紂為傾宮鹿臺以
喪其社稷楚靈以築章華而身受其禍秦始皇作阿房
而殃及其子天下叛之二世而滅夫不度萬民之力以

從耳目之欲未有不亡者也陛下當以堯舜禹湯文武
為法則夏桀殷紂楚靈秦皇為深戒高高在上實監后
德慎守天位以奉祖考巍巍大業猶恐失之不夙夜敬
止克恭卹民而乃自暇自逸惟宮臺是侈是飾必有顛
覆危亡之禍易曰豐其屋蔀其家闕其戶閭其無人王
者以天下為家言豐屋之禍至於家無人也方今二虜
合從謀危宗廟十萬之軍東西奔走邊境無一日之娛
農夫廢業民有饑色陛下不以是為憂而營作宮室無

有已時使國亡而臣可以獨存臣又不言也君作元首
臣為股肱存亡一體得失同之孝經曰天子有諍臣七
人雖無道不失其天下臣雖驚怯敢忘諍臣之義言不
切至不足以感悟陛下陛下不察臣言恐皇祖烈考之
祚將墜於地使臣身死有補萬一則死之日猶生之年
也謹叩棺沐浴伏俟重誅奏御天子感其言忠手筆詔
答明帝著繡帽被縹紉半袖嘗以見直臣阜諫曰此於
禮何法服邪帝默然

杜恕為黃門侍郎明帝時樂安廉昭以才能拔擢頗好
言事恕上疏極諫曰伏見尚書郎廉昭奏左丞曹璠以
罰當闕不依詔坐判問又云諸當坐者別奏尚書令陳
矯自奏不敢辭罰亦不敢以處重為恭意至懇惻臣竊
愍然為朝廷惜之夫聖不擇世而興不易民而治然而
生必有賢智之佐者蓋進之以道帥之以禮故也古之
帝王所以能輔世長民者莫不遠得百姓之懽心近盡
羣臣之智力誠使今朝任職之臣皆天下之選而不能

盡其力不可謂能使人若非天下之選亦不可謂能官人陛下憂勞萬幾或親燈火而庶事不康刑禁日弛豈非股肱不稱之明效歟原其所繇非獨臣有不盡忠亦主有不能使百里奚愚於虞而智於秦豫讓苟容中行而著節智伯斯則古人之明驗矣今臣言一朝皆不忠是誣一朝也然其事類皆可推而得陛下感帑藏之不充實而軍事未息至乃斷四時之賦衣薄御府之私穀帥繇聖意舉朝稱明與聞政事密勿大臣寧有懇懇憂此

者乎騎都尉王才幸樂人孟思所為不法振動京都而其罪狀發於小吏公卿大臣初無一言自陛下踐阼以來司隸校尉御史中丞寧有舉綱維以督姦宄使朝廷肅然者邪若陛下以為今世無良才朝廷乏賢佐豈可追望稷契之遐蹤坐待來世之俊乂乎今之所謂賢者儘有大官而享厚祿矣然而舉上之節未立向公之心不一者委任之責不專而俗多忌諱故也臣以為忠臣不必親親臣不必忠何者以其居無嫌之地而事得自

盡也今有疏者毀人不實其所毀而必曰私報所憎譽而必曰私愛所親左右或因之以進憎愛之說非獨毀譽有之政事損益亦皆有嫌陛下當思所以闡廣朝臣之心篤厲有道之節使之自同古人望與竹帛耳反使如廉昭者擾亂其間臣懼大臣遂將容身保位坐視得失為來世戒也昔周公戒魯侯曰無使大臣怨乎不以不言賢愚明皆當世用也堯數舜之功稱去四凶不言大小有罪則去也今者朝臣不自以為不能以陛下為不任

也不自以為不知以陛下爲不問也陛下何不遵周公
之所以用大舜之所以去使侍中尚書坐則侍帷幄行
則從車輦親對詔問所陳必達則羣臣之行能否皆可
得而知忠能者進闇劣者退誰敢依違而不自盡以陛
下之聖明親與羣臣論議政事使羣臣人得自盡人自
爲親人思所以報賢愚能否在陛下之所用以此理事
何事不辦以此建功何功不成每有軍事詔書嘗曰誰
當此憂者邪吾當自憂耳近詔又曰憂公忘私者必不

然但先公後私即自辯也伏讀明詔乃知聖思究盡下情然亦怪陛下不理其本而憂其末也人之能否實有本性雖臣亦以為朝臣不盡稱職也明主之用人也使能者不敢遺其力而不能者不得處非其任選舉非其人未必為有罪也舉朝共容非其人乃為怪耳陛下知其不盡力也而代之憂其職知其不能也而教之理其事豈徒主勞而臣逸哉雖聖賢竝世終不能以此為理也陛下又患臺閣禁令之不密人事請屬之不絕聽伊

尹作迎客出入之制選司徒更惡吏以守寺門威禁繇之實未得為禁之本也昔漢安帝時少府竇嘉辟廷尉郭躬無罪之兄子猶見舉奏章劾紛紛近司諫校尉孔羨辟大將軍狂悖之弟而有司嘿爾望風希指甚於受屬選舉不以實人事之大者也嘉有親戚之寵躬非社稷重臣猶尚如此以今況古陛下自不督必行之罰以絕阿黨之源耳伊尹之制與惡吏守門非理世之具也使臣之言少蒙察納何患於姦不消滅而養若昭等乎

夫糾擿姦宄忠事也然而世憎小人行之者以其不顧道理而苟求容進也若陛下不復考其終始必以違衆迂世為奉公密行白人為盡節焉有通人大才而更不能為此邪誠顧道理而弗為耳使天下皆背道而趨利則人主之所最病者陛下將何樂焉胡不絕其萌乎先意承旨以求容美率皆天下淺薄無行義者其意務在於適人主之心而已非欲理天下安百姓也陛下何不試變業而示之彼豈執其所守以違聖意哉夫人臣得

人主之心安業也處尊顯之官榮事也食千鍾之祿厚
實也人臣雖愚未有不樂此而喜干迋者也迫於道自
彊耳誠以為陛下當憐而祐之少委任焉如何反錄昭
等傾側之意而忽若人者乎今者外有伺隙之寇內有
貧曠之民陛下當大計天下之損益政事之得失誠不
可以怠也恕在朝八年其論議尤直皆此類也

冊府元龜卷五百三十八

欽定四庫全書

冊府元龜卷五百三十九 宋 王欽若等撰

諫諍部

直諫第六

魏董尋為司徒軍議掾景初元年明帝於芳林園大起
土山植竹樹尋上書諫曰臣聞古之直士盡言於國不
避死亡故周昌比高祖於桀紂劉輔譬趙后於人婢天
生忠直雖白刃沸湯往而不顧者誠為時主愛惜天下

也建安以來野戰死亡或門殫戶盡雖有存者遺孤老
弱若今宮室狹小當廣大之猶宜隨時不妨農務况乃
作無益之物黃龍鳳凰九龍承露盤土山淵池此皆聖
明之所不興也其功參倍於殿舍三公九卿侍中尚書
天下至德皆知非道而不敢言者以殿下春秋方剛心
畏雷霆今陛下既尊羣臣顯以冠冕被以文繡載以華
輿所以異於小人而使穿方舉土面目垢黑沾體塗足
衣冠了鳥毀國之光以崇無益甚無謂也孔子曰君使

臣以禮臣事君以忠無忠無禮國何以立故有君不君
臣不臣父不父子不子上下不通心懷鬱結使陰陽不
和災害屢降克惡之徒因間而起誰當為陛下盡言是
者乎又誰當千萬乘以死為戲乎臣今言出必死而臣
自比九牛之一毛生既無益死亦何損秉筆流涕心為
世辭臣有八子臣死之後累陛下矣將奏沐浴既通帝
曰董尋不畏死耶主者奏收尋有詔勿問

明帝取農民以理宮室典農母丘儉上疏曰臣愚以為

天下所急除者二賊所急務者衣食誠使二賊不滅士民飢凍雖崇羨宮室猶無益也

張茂為太子舍人青龍中大理雒陽宮納士民妻女茂以吳蜀數動諸出征而帝盛興宮室留意於玩好賜與無度帑藏空竭又錄奪士女前已嫁為吏民妻者還以配士既聽以生口自贖簡選其姿首者內之掖庭乃上書諫曰臣伏見詔書諸士女嫁非士者一切錄以配戰士斯誠權時之宜然非大化之善者也臣請議之陛下

天之子也百姓吏民亦陛下之子也禮賜君子小人不
同所以殊貴賤也吏屬君子士為小人今奪彼以與此
亦無以異於奪兄之妻妻弟也於父母之恩偏矣又詔
書聽得以生口年紀顏色與妻相當者自代故富者則
傾家盡產貧者則假貸貲貲買生口以贖其妻縣官以
配士得婦者未有歡心而失妻者必有憂色或窮或愁
皆不得志夫君有天下而不得萬姓之歡心者豈不危
殆且軍師在外數十萬人一日之費非徒千金舉天下

之賦以奉此役猶將不給况復有宮庭非負無錄之女
椒房母后之家賞賜橫興内外交引其費半軍昔漢武
帝好神仙信方士掘地為海聚土為山賴是時天下為
一莫敢與爭者爾自衰亂以來四五十載馬不捨鞍士
不釋甲每一交戰血流丹野創痍號痛之聲于今未已
彊寇在疆圖危魏室陛下不兢兢業業念崇節約思所
以安天下者而乃夸靡是務中尚方純作玩弄之物炫
耀後園建承露之盤斯誠快耳目之觀然亦足以騁寇

讐言之心矣惜乎舍堯舜之節儉而為漢武之侈事臣竊
惟陛下不取也願陛下沛然下詔萬幾之事無益而有
損者悉除去之以所除無益之費厚賜將士父母妻子
之飢寒者問民所疾而除其所惡實倉廩繕甲兵恪恭
以臨天下如是吳賊面縛蜀虜輿櫬不待誅而自伏太
平之路可計日而待也陛下可無勞神思於海表軍師
高枕戰士備員令羣公皆結舌而臣所以不敢不獻瞽
言者臣昔上要言散騎奏臣書以聽諫篇為善詔曰是

也擢臣為太子舍人且臣為書譏為人臣不能諫諍今有可諫之事而臣不諫此為作書虛妄而不能言也臣年五十常恐至死無以報國是以投軀沒命冒昧以聞惟陛下裁察書通上顧左右曰張茂恃鄉里故也以事付散騎而已

高堂隆為散騎常侍青龍中大治殿舍西取長安大鐘隆上疏曰昔周景王不儀刑文武之明德忽公旦之聖制既鑄大錢又作大鐘單穆公諫而弗聽伶州鳩對而

弗從遂迷不反周德以衰良史記焉以為永鑒然今之
小人好說秦漢之奢靡以盪聖心求取亡國不度之器
勞役費損以傷德政非所以興禮樂之和保神明之休
也是日帝幸上方隆與卞蘭從帝以隆表授蘭使難隆
曰興衰在政樂何為也化之不明豈鐘之罪隆曰夫禮
樂者為治之大本也故簫韶九成鳳凰來儀雷鼓六變
天神以降政是以平刑是以措和之至也新聲發響商
辛以沒大鐘既鑄周景以斃存亡之機常繇斯作安在

廢興之不階也君舉必書古之道也作而不法何以示
後聖王樂聞其闕故有箴規之道忠臣願竭其節故有
匪躬之義也帝稱善遷侍中猶領太史令有星孛于大
辰隆上疏曰凡帝王徙都立邑必先定天地社稷之位
敬恭以奉之將營宮室則宗廟為先廡庫為次居室為
後今園丘方澤南北郊明堂社稷神位未定宗廟之制
又未如禮而崇飾宮室士民失業外人咸云宮人之用興
戎軍國之費所盡畧齊民不堪命皆有怨怒書曰天聰

明自我民聰明天明畏自我民明威興人作頌則嚮以
五福民怒吁嗟則威以六極言天之賞罰隨民言順民
心也是以臨政務在安民為先然後稽古之化格于上
下自古及今未嘗不然也夫采椽卑宮唐虞大禹之所
以垂皇風也玉臺瓊室夏癸商辛之所以犯昊天也今
之宮室實違禮度乃更建立九龍華飾過前天彗章灼
始起於房心犯帝座而干紫微此乃皇天子愛陛下是
以發教戒之象始卒皆於尊位殷勤鄭重欲必覺陛下

斯乃慈父懇切之訓宜崇孝子祇從之禮以率先天下
以昭示後昆不宜有忽以重天怒景初中愈增崇宮殿
雕飾觀閣鑿太行之石英采穀城之丈石起景陽山於
芳林之園建昭陽殿於太極之北鑄作黃龍鳳凰奇偉
之獸飾金墉凌雲臺凌霄闕百役繁興作者萬數公卿
以下至學士莫不展力帝乃躬自掘土以率之而遼東
不朝悼皇后山陵天作淫雨冀州水出漂沒民物隆上
疏諫曰蓋天地之大德曰生聖人之大寶曰位何以守

位曰仁何以聚人曰財然則士民者乃國家之鎮也穀
帛乃士民之命也穀帛非造化不育非人力不成是以
帝畊以勸農后桑以成服所以昭事上帝告虔報施也
昔在伊唐世值陽九厄運之會洪水滔天使鯀理之績
用不成乃舉文命隨山刊木前後歷年二十載災青之
甚莫過於彼力役之興莫久於此堯舜君臣南面而已
禹敷九州庶士庸勲各有差等君子小人物有服章今
無若時之急而使公卿大夫竝與厮徒共供事役聞之

四夷非嘉聲也垂之竹帛非令名也是以有國有家者
近取諸身遠取諸物嫗煦養育故稱愷悌君子民之父
母今上下勞役疾病凶荒耕稼者寡饑饉薦臻無以卒
歲宜加愍卹以救其困臣觀在昔書籍所載天人之際
未有不應也是以古先哲王畏上天之明命循陰陽之
逆順兢兢業業惟恐有違然後理道用興德與神符災
異既發懼而脩政未有不延期流祚者也爰及末葉闇
君荒主不崇先王之令軌不納正士之直言以遂其情

志恬忽變戒未有不尋踐禍難至於顛覆者也天道既著請以人倫論之夫六情五性同在於人嗜欲廉貞各居其一及其動也交爭于心欲強質弱則縱濫不禁精誠不制則放溢無極夫情之所在非好則美而美好之集非人力不成非穀帛不立苟情無極則人不堪其勞物不充其求勞求並至將起禍亂故不割情無以相供仲尼云人無遠慮必有近憂繇此觀之禮義之制非苟拘分將以遠害而興治也今吳蜀二賊非徒白地小虜

聚邑之寇乃據險乘流跨有士衆僭號稱帝欲與中國
爭衡今若有人來告權備竝脩德政復履清儉省租
賦不理玩好動咨耆賢事遵禮度陛下聞之豈不惕然
惡其如此以為難卒討滅而為國憂乎若使告者曰彼
二賊竝為無道崇侈無度役其士民重其徵賦下不堪
命吁嗟日甚陛下聞之豈不勃然忿其困我無辜之民
而欲速加之誅其次豈不幸彼疲弊而取之不難乎苟
如此則可易心而度事議之數亦不遠矣且秦始皇不

築道德之基而築阿房之宮不憂蕭牆之變而修長城之役當其君臣為此計也亦欲立萬世之業使子孫長有天下豈意一朝匹夫大呼而天下傾覆哉故臣以為使先代之君知其所行將至於敗則弗為之矣是以亡國之主自謂不亡然後至於亡賢聖之君自謂將亡然後至於不亡昔漢文帝稱為賢主躬行儉約惠下養民而賈誼方之以為天下倒懸可為痛哭者一可為流涕者二可為長歎息者三况今天下彫弊民無儋石之儲

國無終年之蓄外有強敵六軍暴邊內興土功州郡騷動若有寇警則臣懼版築之士不能投命虜庭矣又將吏俸祿稍見折減方之於昔五分居一諸受休者又絕廩賜不應輸者今皆出半此為官入兼名於舊其所出與參少於昔而度支經用更每不足牛肉小賦前後相繼反而推之凡此諸費必有所在且夫祿賜穀帛人主所以惠養吏民而為之司命者也若今有費是奪其命矣既得之而又失之此生怨之府也周禮天府掌九賦

之則以給九式之用入有其分出有所不相干乘而用
各足各足之後乃以式貢之餘供王玩好又上用財必
考于司會今陛下所與共坐廊廟理天下者非三司九
列則臺閣近臣皆腹心造膝宜在無諱若見豐省而不
敢以告從命奔走惟恐不勝是則具臣非鯁輔也昔李
斯教秦二世曰為人主而不恣睢命之曰天下桎梏二
世用之秦國以覆斯亦滅族是以史遷譏其不正諫而
為世誠書奏帝覽焉謂中書監令曰觀隆此奏使朕懼

哉

王肅為散騎常侍明帝宮室盛興而期會迫急有稽限者帝親召問言猶在口身首已分肅抗疏曰大魏承百王之極生民無幾干戈未戢誠宜息民而惠之以安靜遐邇之時也夫務畜積而息疲民在於省徭役而勤稼穡今宮室未就功業未訖運漕調發轉相供奉是以丁夫疲於力作農者離其南畝種穀者寡食穀者衆舊穀既沒新穀莫繼斯則有國之大患而非脩豫之長策也

今見作者三四萬人九龍可以安聖體其內足以列六宮顯陽之殿又向將畢惟泰極已前功夫尚大方向盛寒疾疾或作誠願陛下發德音下明詔深愍役夫之疲勞厚矜兆民之不贍取嘗食廩之士非急要者之用選其丁壯擇留萬人使一暮而更之咸知息代有日則莫不悅以即事勞而不怨矣計一歲有三百六十萬夫亦不為少當一歲成者聽且三年分遣其餘使皆即農無窮之計也倉有溢粟民有餘力以此興功何功不立以

此行化何化不成夫信之於民國家大寶也仲尼曰自古皆有死民無信不立夫區區之晉國微微之重耳欲用其民先示以信是故原雖將降顧信而歸用能一戰而霸于今見稱前車駕當幸雒陽發民為營有司命以營成而罷既成又利其功力不以時遣有司徒營其目前之利不顧經國之體臣愚以為自今以後倘復使民宜明其令使必如期若有事以次寧復更發無或失信凡陛下臨時之所行刑皆有罪之吏宜死之人也然衆

庶不知謂為倉卒故願陛下下之於吏而暴其罪鈞其死也無使汙于宮掖而為遠近所疑且人命至重難生易殺氣絕而不續者也是以聖賢重之孟軻稱殺一不辜以取天下仁者不為也漢時有犯蹕警乘輿馬者廷尉張釋之奏使罰金文帝怪其輕而釋之曰方其時上使誅之則已今下廷尉廷尉天下之平也一傾之天下用法皆為輕重民安措其手足臣以為大失其義非忠臣所宜陳也廷尉者天子之吏也猶不可以失平而天

子之身反可以惑謬乎斯重於為已而輕於為君不忠之甚也周公曰天子無戲言言則史書之工誦之士稱之言猶不戲而況行之乎故釋之之言不可不察周公之戒不可不法也又陳諸禽獸無用之物而有芻穀人徒之費皆可蠲除

王基為中書侍郎明帝盛修宮室百姓勞瘁基上疏曰臣聞古人以水喻民曰水所以載舟亦所以覆舟故在民上者不可以不戒懼夫民逸則慮易苦則思難是以

先王居之以儉約俾不至於生是患者顏淵云東野子之御馬力盡矣而求進不已是以知其將敗今事役勞苦男女離曠願陛下深察東野之弊留意舟水之喻息奔駟於未盡節力役於未困昔漢有天下至孝文時唯有同姓諸侯而賈誼憂之曰置火積薪之下而寢其上因謂之安也今寇賊未殄猛將擁兵簡之則無以應敵久之則難以遺後當盛明之世不務以除患若子孫不競社稷之憂也使賈誼復起必深切於曩時矣

衛覲為尚書明帝時百姓彫匱而役務方殷覲上疏曰
夫變情屬性強所不能人臣言之既不易人主受之又
艱難且人之所樂者富貴顯榮也所惡者貧賤死亡也
言此四者君上之無制也君愛之則富貴顯榮君惡之
則貧賤死亡也順之者愛之所由來逆意者惡之所從
至也故人臣皆爭順指而避逆意非破家為國殺身成
君者誰能犯顏色觸忌諱建一言開一說陛下留意察
之則臣下之情可見矣今議者多好悅耳其言理政則

比陛下於堯舜其言征伐則比二虜於狸鼠臣以為不然昔漢文之時諸侯強大賈誼累息以為至危況今四海之內分而為三羣士陳力各為其主其來降者未肯言舍邪就正咸稱迫於困急是與六國分理無以為異也當今千里無煙遺民困苦陛下不善留意將遂彫弊難可復振禮天子之器必有金玉之飾飲食之餽必有八珍之味至於凶荒則徹膳降服然後奢儉之節必視世之豐約也武皇帝之時後宮食不過一肉衣不用錦

繡茵蓐不緣飾器物無丹漆用能平定天下遺福子孫
此皆陛下之所親覽也當今之務宜君臣上下並用籌
策計較府庫量入為出深思句踐滋民之術繇恐不及
而尚方所造金銀之物漸更增工役不輟侈靡日崇帑
藏日竭昔漢武信求神仙之道謂當得雲表之露以餐
玉屑故立仙掌以承高露陛下通明每所非笑漢武有
求於露而繇尚見非陛下無求於露而空設之不益於
好而糜費功夫誠皆聖慮所宜裁制也觀歷漢魏時獻

忠言率如此

蜀譙周為太子家令時後主頗出游觀增廣聲樂周上
疏諫曰昔王莽之敗豪傑竝起跨州據郡欲弄神器於
是賢才智士思望所歸未必以其勢之廣狹惟其德之
厚薄也是故於時更始公孫述及諸有大衆者多已廣
大然莫不快情恣欲怠於為善游獵飲食不恤民物世
祖初入河北馮異等勸之曰當行人所不能為遂務理
冤獄節儉飲食勤遵法度故北州歌歎聲布四遠於是

鄧禹自南陽追之吳漢寇恂未識世祖遙聞德行遂以
權計舉漁陽上谷突騎迎于廣阿其餘望風慕德者邳
彤耿純劉植之徒至于輿病齋棺襁負而至者不可勝
數故能以弱為強屠王郎吞銅馬折赤眉而成帝業也
又在雒陽嘗欲小出車駕已御銑期諫曰天下未寧臣
誠不願陛下數出即時還車及征隗囂潁川盜起世祖
還雒陽但遣寇恂往恂曰潁川以陛下遠征故姦猾起
叛未知陛下還恐不時降陛下自臨潁川賊必即降遂

至潁川竟如恂言故非急務欲小出不敢至於急務欲
自安不為故帝者之欲善也如此故傳曰百姓不徒附
誠以德先之也今漢遭厄運天下三分雄哲之士思望
之時也陛下天姿至孝喪踰三年言及隕涕曾閔不過
也敬賢任才使之盡力有踰成康故國內和一大小戮
力臣所不能陳然臣不勝大願願復廣人所不能者夫
輓大重者其用力苦不衆拔大艱者其善術苦不廣且
承事宗廟者非徒求福祐所以率民尊上也至於四時

之祀或有不臨池苑之觀或有仍出臣之愚滯私不自安夫憂責在身者不暇盡樂先帝之志堂構未成誠非盡樂之時願省減樂官後宮所增造但脩奉先帝所施下為子孫節儉之教

吳張紘為長史大帝征合肥率輕騎將往突敵紘諫曰夫兵者凶器戰者危事也今麾下恃盛壯之氣忽強暴之虜三軍之衆莫不寒心雖斬將搴旗威震敵場此乃偏將之任非主將之宜也願抑貴育之勇懷霸王之計

大帝納紘言而止既還明年將復出軍紘又諫曰自古
帝王受命之君雖有皇靈佐於上文德播於下亦賴武
功以昭其勲然而貴於時動乃後為威耳今麾下值四
百之厄有扶傾之功宜且隱息師徒廣開播植任賢使
能務崇寬惠順天命以行誅可不勞而定也於是遂止
不行

薛綜為尚書僕射公孫淵降吳而復叛大帝盛怒欲自
親征綜上疏諫曰夫帝王者萬國之元首天下之所係

命也是以居則重門擊柝以戒不虞行則清道按節以養威嚴蓋所以存萬安之福鎮四海之腹心昔孔子疾時託乘桴浮海之語季由斯喜拒以無所取材漢元帝欲御樓船薛廣德請刎頸以血染車何則水火之險至危非帝王所宜涉也諺曰千金之子坐不垂堂况萬乘之尊乃欲輕舉乎夫小國無城郭之固備禦之術器械銖鈞草創無政往必禽克誠如明詔然其方土寒埔穀稼不植民習鞍馬轉徙無常卒聞大軍之至自度不敵

鳥驚獸駭長驅奔竄一人匹馬不可得見雖獲其地守
之無益此不可一也加又洪流滉漾有成山之難海行
無常風波難免倏忽之間人船異勢雖有堯舜之德計
無所施賁育之勇力不得設此不可二也加以鬱霧冥
其上鹹水蒸其下善生流種轉相滲染凡行海者稀無
斯患此不可三也天生神聖顯以符瑞當承平喪亂康
此民物嘉祥日集海內垂定逆虜凶虐滅亡在近中國
一平淵力自弊但當拱手以待耳今乃違必然之圖尋

至危之阻忽九州之固肆一朝之忿既非社稷之重計
又開闢以來所未嘗有斯誠羣僚所以傾身側息食不
甘味寢棄安席者惟陛下抑雷霆之威忍赫斯之怒遵
乘橋之安遠履冰之險則臣子賴祉天下幸甚時羣臣
多諫權遂不行

陸瑁為選曹尚書大帝忿公孫淵之狙詐反覆欲親征
之瑁上疏諫曰臣聞聖王之御遠夷羈縻而已不常保
有故古者制地謂之荒服言恍惚無常不可保也今淵

東夷小醜屏在海隅雖託人面與禽獸無異國家所謂
不愛貨寶遠以爵命加之者非嘉其德義也誠欲納誘
愚筭以規其馬耳淵之驕黠恃遠負命此乃荒貌常態
豈足深怪昔漢諸君亦嘗銳意以事外夷馳使散貨充
滿西域雖時有恭從然其使人見害財貨并沒不可勝
數今陛下不忍悁悁之忿欲越巨海身踐其土羣臣愚
議竊謂不安何者北寇與國壤接地連苟有間隙應機
而至夫所以越海求馬曲意於淵者為赴目前之急除

腹心之疾也而更棄本追末捐近治遠忽以改規激以動衆斯乃猾虜所願聞非大吳之至計也又兵家之術以功役相疲勞逸相待得失之間所覺輒多且沓渚去淵道里尚遠今到其岸兵勢三分使强者進取次當守船又次運糧行人雖多難行悉用加以單步負糧輕遠深入賊地多馬邀截無常若淵狙詐與北未絕動衆之日唇齒相濟若實子然無所憑賴其畏怖遠遁或難卒滅使天誅稽於朔野山虜乘間而起恐非萬安之長慮

也帝未許瑁重上疏曰夫兵革者固前代所以誅暴亂
威四夷也然其役皆在姦雄已除天下無事從容廟堂
之上以餘議議之至於中夏鼎沸九域槃牙之時率須
深根固本愛力惜費務自將養以待隣敵之闕未有正
於此時舍近治遠以疲軍旅者也昔尉佗叛逆僭號稱
帝于時天下又安百姓殷阜帶甲之數糧食之計可謂
多矣然漢文猶以遠征不易重興師旅告喻而已今凶
桀未殄疆場猶警雖蚩尤鬼方之亂故當以緩急差之

未宜以淵為先願陛下抑威任計暫寧六師潛神嘿規
以為後圖天下幸甚帝再覽瑁書嘉其詞理端切遂不
行

顧譚為平尚書事魯王霸有盛寵與太子和齊衡譚上
疏曰臣聞有國有家者必明嫡庶之端異尊卑之禮使
上下有差階級踰邈如此則骨肉之恩生覬覦之望絕
昔賈誼陳治安之計論諸侯之勢以為勢重雖親必有
逆節之累勢輕雖疎必有保全之祚故淮南親弟不終

饗國失之於勢重也吳芮踈臣傳祚長沙得之於勢輕也昔漢文帝使慎夫人與皇后同席素盎退夫人之坐帝有怒色及盎解上下之儀陳人覘之戒帝既悅懌夫人以悟今臣所陳非有所偏誠欲以安太子而便魯王也由是霸與譚有隙

步隲為驃騎將軍時中書呂壹典校文書多所糾舉隲上疏曰伏聞諸典校撻挾細微吹毛求瑕重按深誣趨欲陷人以成威福無罪無辜橫受大刑是以使民跼天

踏地誰不戰慄昔之獄官惟賢是任故臯陶作士呂侯
贖刑張子廷尉民無冤枉休泰之祚實由此興今之小
臣動與古異獄以賄成輕忽人命歸咎于上為國速怨
夫一人吁嗟王道為虧甚可仇疾明德慎罰哲人惟刑
書傳所美目今蔽獄都下則宜諮顧雍武昌則陸遜潘
濬平心專意務在得情鴈黨神明受罪何恨又曰天子
父天母地故宮室百官動法列宿若施政令欽順時節
官得其人則陰陽和平七曜循度至於今日官僚多闕

雖有大臣復不信任如此天地焉得無變故頻年枯旱
亢陽之應也又嘉禾六年五月十四日赤烏二年正月
一日及二十七日地皆震動地陰類臣之象陰氣盛故
動臣下專政之故也夫天地見異所以警悟人主可不
深思其意哉又曰丞相顧雍上大將軍陸遜太常潘濬
深貴重臣在竭誠夙夜兢兢寢食不寧念欲安國利民
建久長之計可謂心膂股肱社稷之臣矣宜各委任不
使他官監其所司責其功效課其負殿此三者思慮不

到則已豈敢專擅威福欺負所天乎又曰懸賞則顯善
設刑以威姦任賢而能使審明于法術則何功而不成
何事而不辦何聽而不聞何視而不覩哉若今郡守百
里皆各得其人共相經緯如是庶政豈不康哉竊聞諸
縣並有脩吏吏多民煩俗以之弊但小人因緣御命不
務奉公而作威福無益視聽更為民害愚以為可一切
罷省帝亦覺悟遂誅呂壹隲前後薦達屈滯救解患難
書數十上帝雖不能悉納然時采其言多蒙濟賴

羊衡為督軍使者時太子和與弟魯王霸不睦衡上疏
曰臣聞古之有天下者皆先顯別適庶封建子弟所以
尊重祖宗為國藩表也二宮拜授海內稱宜斯乃大吳
興隆之基頃聞二宮並絕賓客遠近悚然大小失望竊
從走下風聽採衆論咸謂二宮智達英茂自正名建號
於今三年德行內著美稱外昭西北二隅久所服聞謂
陛下當副遐邇所以歸德勤命二宮賓延四遠使異國
聞聲思為臣妾今既未垂意於此而發明詔省奪備衛

抑絕賓客使四方禮敬不復得通雖實陛下敦尚古義
欲令二宮專志於學不復顧慮視聽小宜期於溫故博
物而已然非臣下傾企顙顙之至願也或二宮不遵典
式此臣所以寢息不寧就如所嫌猶宜補察密加九酌
不使遠近得容異言臣懼積疑或謗久將宣流而西北
二隅去國不遠異同之語易以聞達聞達之日聲論當
興將為二宮有不順之愆不審陛下何以解之若無以
解異國則無以釋境內境內守疑異國興謗非所以育

巍巍鎮社稷也願陛下早發優詔使二宮周旋禮命如
初則天清地晏萬國幸甚矣

華覈為中書丞時孫皓更營新宮制度弘廣飾以珠玉
所費甚多是時盛夏興工農守並廢覈上疏諫曰臣聞
漢文之世九州晏然秦民熹去慘毒之苛政歸劉氏之
寬仁省役約法與之更始分王子弟以藩公室當此之
時皆以為泰山之安無窮之基也至於賈誼有以為可
痛哭及流涕者三可為長嘆息者六乃曰今時之勢何

異抱火於積薪之下而寢其上火未及然而謂之安其
後變亂皆如其言臣雖下愚不識大倫竊以曩時之事
揆今之勢誼云復數年間諸王方剛漢之傳相稱疾罷
歸欲以此為治雖堯舜不能安今大敵據九州之地有
大半之衆習攻戰之餘術乘戎馬之舊勢欲與中國爭
相吞之計其猶楚漢勢不兩立非徒漢之諸王淮南濟
北而已誼之所欲痛哭比今為緩抱火卧薪之喻於今
為急大皇帝覽前代之如彼察今勢之如此故廣開農

桑之業積不訾之儲恤民重役務養戰士是以大小感恩各思竭命期運未至早棄萬國自是之後強臣專政上詭天時下違衆議亡安存之本邀一時之利數興軍旅傾竭府藏兵勞民困無時獲安今之存者乃創痍之餘衆哀苦之餘民耳遂使軍資空匱倉廩不實布帛之賜寒暑不周重以失業家戶不贍而北方積穀養民專心東向無復他警蜀為西藩土地險固加承先主統御之術謂其守御足以長久不圖一朝奄至傾覆唇亡齒

寒古人所懼交州諸郡國之南土交趾九真二郡已沒
日南孤危存亡難保合浦以北民皆搖動因連避役多
有離叛而備戍減少威鎮轉輕常恐呼吸復有變故昔
海虜窺甯東縣多得離民地習海行狃於往年鈔盜無
日今克背有嫌首尾多難乃國朝之厄運也誠宜除建
立之役先備預之計勉墾植之業為飢乏之救惟恐農
時將過東作向晚有事之日整嚴未辦若舍此急盡力
功作卒有風塵不虞之變當委版築之役應烽燧之急

驅怨苦之衆赴白刃之難此乃大敵所因為資也如但
固守曠日持久則軍糧必乏不待接刃而戰士已困矣
昔太戊之時桑穀生庭懼而脩德怪消殷興熒惑守心
宋以為災景公下從瞽史之言而熒惑退舍景公延年
夫修德於身而感異類言發于口而通神明臣以為愚
蔽誤忝近侍不能翼宣仁澤以感靈祇仰慙俯愧無所
逃處退伏思維熒惑桑穀之異天示二主至如他餘錙
介之妖近是門庭小神所為驗之天地無有他變而徵

祥符瑞前後屢臻明珠既覲白雀繼見萬億之祚實靈
所挺以九域為宅天下為家不與編戶之民轉徙同也
又今之宮室先帝所營卜土立基非為不祥又揚市土
地與宮連接若大功畢興駕遷佳門行之神皆轉移猶
恐長久未必勝舊屢遷不可留則有嫌此乃愚臣所以
夙夜為憂灼也臣省月令季夏之月不可以興土功不
可以會諸侯不可以起兵動衆舉大事必有天殃今雖
諸侯不會諸侯之軍與會無異六月戊巳土行正王既

不可犯加又農月時不可失昔魯隱公夏城中丘春秋
書之垂為後戒今築宮為長世之洪基而犯天地之大
禁襲春秋之所書廢禁授之上務臣以愚管竊所未安
又恐所召離民或有不至者討之則廢役興事不討則
日月滋蔓若悉並到大衆聚會希無疾病且人心安則
念善苦則怨叛江南精兵北土所難欲以一卒當東一
人天下未定深可憂惜之如此宮成死叛十五則北軍
之衆更增五萬若到萬人則倍增十萬病者有死亡之

損叛者傳不善之語此乃大敵所以歡喜也今當角力
中原以定強弱正於際會彼益我損加以勞困此乃雄
夫智士所以深憂臣聞先王治國無三年之儲曰國非
其國安寧之世戒備如此况敵強大而忽農亡畜今雖
頗種植間者大水沉沒其餘存者當須耘耨而長吏怖
期上方諸郡身涉山林盡力伐材廢農棄務士民妻孥
羸小墾植又薄若有水旱則永無所獲州郡見米當待
有事冗食之衆仰官供濟若上下空乏運漕不供而北


敵犯疆使周召更生良平復出不能為陛下計明矣臣聞君明者臣忠主聖者臣直是以惴惴昧犯天威乞垂哀省書奏皓不納覈遷東觀令領右國史時倉廩無儲世俗滋侈覈上疏曰今寇虜充斥征伐未已居無積年之儲出無應敵之畜此乃有國者所宜深憂也夫財穀所生當出於民趨時務農國之上急而都下諸官所掌別異各自下調不計民力輒與近期長吏畏罪晝夜催民委舍佃事遑赴會日促送到都或蘊積不用而徒使

百姓消力失時到秋收月督其限入奪其播植之時而責其今年之稅如有逋懸則籍沒財物故家戶貧困衣食不足宜暫息衆役專心農桑故人稱一夫不耕或受其飢一女不織或受其寒是以先王治國惟農是務軍興已來已向百戰農人廢南畝之務士女停機杼之業推此揆之則蔬食而長饑薄衣而履冰者固不少矣臣聞主之所求於民者二民之所望於主者三二謂求其為已勞也求其為已死也三謂飢者能食之勞者能息

之有功者能賞之民以致其二事而主失其三望者則
怨心生而功不建今帑藏不實民勞役猥主之二求已
備民之三望未報且飢者不待羹饌而後飽寒者不俟
狐貉而後溫滋味者口之奇文繡者身之飾今事多而
役繁民貧而俗奢百工作無用之器婦人為綺靡之飾
不勤麻枲並繡文黼黻轉相倣倣恥獨無有兵民之家
猶復逐俗內無儋石之儲而出有綾綺之服至於富賈
商販之家重以金銀奢恣尤甚天下未平百姓不贍宜

益生民之原豐穀帛之業而棄功於浮華之巧妨日於侈靡之事上無尊卑等級之差下有耗財費力之損今吏士之家少無子女多者三四少者一二通令戶有一女子萬家則十萬人織績一歲一束則十萬束矣使四疆之內同心戮力數年之間布帛必積恣民五色惟所服用但禁綺繡無益之飾且美貌者不待華采以崇好豔姿者不待文綺以致愛五彩之飾足以麗矣若極粉黛窮盛服未必無醜婦廢華彩去文繡未必無美人也

若實如論有之無益廢之無損者何愛而不暫禁以
充府藏之急乎此救乏之上務富國之本業也雖管晏
復生無以易此漢之文景承平繼統天下已定四海無
虞猶以雕文之傷農事錦繡之害女工開富國之利杜
飢寒之本況今六合分垂豺狼充路兵不離強甲不解
帶而可以不廣生財之原充府藏之積哉



冊府元龜卷五百三十九